

律  
疏  
禮  
書

續東國圖志

蘇氏易傳卷之一

宋 蘇軾子瞻 著

三三

乾下  
乾上

乾元亨利貞初九潛龍勿用

乾之所以取于龍者以其能飛能潛也飛者其  
正也不得其正而能潛非天下之至健其孰能  
之

九二見龍在田利見大人

飛者龍之正行也天者龍之正處也見龍在田  
明其可安而非正也

九三君子終日乾乾夕惕若厲无咎

九三非龍德歟曰否進乎龍矣此上下之際禍福之交成敗之決也徒曰龍者不足以盡之故曰君子夫初之所以能潛二之所以能見四之所以能躍五之所以能飛皆有待於三焉甚矣三之難處也使三不能處此則乾喪其所以爲乾矣天下莫大之福不測之禍皆萃於我而求決焉其濟不濟間不容髮是以終日乾乾至於夕而猶惕然雖危而无咎也

九四或躍在淵无咎

下之上上之下其爲重剛而不中上不在天下不在田者均也而至於九四獨躍而不惕者何哉曰九四既進而不可復反者也退則入於禍故教之躍其所以異於五者猶有疑而已三與四皆禍福雜故有以處之然後无咎

九五飛龍在天利見大人

今之飛者昔之潛者也而誰非大人歟曰見大人者皆將有求也惟其處安居正而後可以求

得九二者龍之安九五者龍之正也

上九亢龍有悔

夫處此者豈无无悔之道哉故言有者皆非必然者也

用九見羣龍无首吉

見羣龍明六爻皆然也蔡墨云其姤曰潛龍勿用其同人曰見龍在田其大有曰飛龍在天其夬曰亢龍有悔其坤曰見羣龍无首吉古之論卦者以定論爻者以變姤者初九之變也同人

者九二之變也大有者九五之變也夬者上九之變也各指其一而坤則六爻皆變吾是以知用九之通六爻也用六亦然

彖曰大哉乾元萬物資始乃統天

此論元也元之爲德不可見也其可見者萬物資始而已天之德不可勝言也惟是爲能統之此所以爲元也

雲行雨施品物流行

此所以爲亨也

大明終始六位時成

此所以爲利也生而成之乾之終始也成物之謂利矣

時乘六龍以御天

飛潛見躍各適其時以用我剛健之德也

乾道變化各正性命

此所以爲貞也

保合大和乃利貞

通言之也貞正直也方其變化各之於情无所



不至反而循之各直其性以至於命此所以爲  
貞也世之論性命者多矣因是請試言其麤曰  
古之言性者如告瞽者以其所不識也瞽者未  
嘗有見也欲告之以是物患其不識也則又以  
一物狀之夫以一物狀之則又一物也非是物  
矣彼惟无見故告之以一物而不識又可以多  
物眩之乎古之君子患性之難見也故以可見  
者言性夫以可見者言性皆性之似也君子日  
脩其善以消其不善不善者日消有不可得而

消者焉小人日脩其不善以消其善善者日消  
亦有不可得而消者焉夫不可得而消者堯舜  
不能加焉桀紂不能亡焉是豈非性也哉君子  
之至於是用是爲道則去聖不遠矣雖然有至  
是者有用是者則其爲道常二猶器之於手不  
如手之自用莫知其所以然而然也性至於是  
則謂之命命令也君之令曰命天之令曰命性  
之至者亦曰命性之至者非命也无以名之而  
寄之命也歿生禍福莫非命者雖有聖智莫知

其所以然而然君子之於道至於一而不二如  
手之自用則亦莫知其所以然而然矣此所以  
寄之命也情者性之動也泝而上至於命沿而  
下至於情无非性者性之與情非有善惡之別  
也方其散而有爲則謂之情耳命之與性非有  
天人之辨也至其一而无我則謂之命耳其於  
易也卦以言其性爻以言其情情以爲利性以  
爲貞其言也互見之故人莫之明也易曰大哉  
乾乎剛健中正純粹精也夫剛健中正純粹而

精者此乾之大全也卦也及其散而有爲分裂  
四出而各有得焉則爻也故曰六爻發揮旁通  
情也以爻爲情則卦之爲性也明矣乾道變化  
各正性命保合大和乃利貞以各正性命爲貞  
則情之爲利也亦明矣又曰利貞者性情也言  
其變而之乎情反而直其性也

首出庶物萬國咸寧

至於此則无爲而物自安矣

象曰天行健君子以自強不息

夫天豈以剛故能健哉以不息故健也流水不  
腐用器不蠹故君子莊敬日強安肆日媮強則  
日長媮則日消

潛龍勿用陽在下也見龍在田德施普也終日乾  
乾反復道也

王弼曰居上不驕在下不憂反復皆道也

或躍在淵進无咎也飛龍在天大人造也亢龍有  
悔盈不可久也用九天德不可爲首也  
文言曰元者善之長也亨者嘉之會也

陰陽和而物生曰嘉

利者義之和也貞者事之幹也君子體仁足以長人嘉會足以合禮利物足以和義貞固足以幹事君子行此四德者故曰乾元亨利貞

禮非亨則偏滯而不合義非利則慘冽而不和初九曰潛龍勿用何謂也子曰龍德而隱者也不易乎世

王弼曰不爲世所易

不成乎名遯世无悶不見是而无悶樂則行之憂

則違之確乎其不可拔潛龍也九二曰見龍在田  
利見大人何謂也子曰龍德而正中者也庸言之  
信庸行之謹閑邪存其誠善世而不伐德博而化  
易曰見龍在田利見大人君德也

堯舜之所不能加桀紂之所不能亡是謂誠凡  
可以閑而去者无非邪也邪者盡去則其不可  
去者自存矣是謂閑邪存其誠不然則言之  
信謹蓋未足以化也

九三曰君子終日乾乾夕惕若厲无咎何謂也子

曰君子進德修業忠信所以進德也脩辭立其誠所以居業也

修辭者行之必可言也修辭而不立誠雖有業不居矣

知至至之可與幾也知終終之可與存義也

至之爲言往也終之爲言止也乾之進退之決在三故可往而往其幾可止而止其義

是故居上位而不驕在下位而不憂故乾乾因其時而惕雖危无咎矣九四曰或躍在淵无咎何謂



也子曰上下无常非爲邪也進退无恒非離羣也  
君子進德修業欲及時也故无咎九五曰飛龍在  
天利見大人何謂也子曰同聲相應同氣相求水  
流濕火就燥雲從龍風從虎聖人作而萬物覩  
燥濕不與水火期而水火卽之龍虎非有求於  
風雲而風雲應之聖人非有意於物而物莫不  
欲見之

本乎天者親上本乎地者親下則各從其類也

明龍之在天也